



16. august 2019

UKA2019/53

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matu-muuna saqqummiuppara:

**Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaat allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisip allanngortinneratigut qulakkeerneqassaaq, kalaallit nunani allani ilinniartut qitornaasa<sup>1</sup> kommunip meeqperiviutaanut ulluuneraniluunniit angerlarsimaffinni paaqqinnittarfinnut utaqqisunut allanut naleqqiullugu sallinngortinneqartalernissaat ilinniartup Kalaallit Nunaanni sullivimmi imaluunniit oqartussaaffiit arlaanni sulilernissaminut isumaqatigiissuteqarluni takutissinnaappagu.**

(Inatsisartunut ilaasortaq Malene Vahl Rasmussen, Demokraatit)

#### **Tungavilersuut**

Inuusuttut nunanut allanut ilinniariarsimasut ilarpaalussui ajorluartumik uteqqinneq ajorput. Tamanna assigiinngitsunik arlalinnik pissuteqarpoq pissutaasullu paasinartumik allaaserineqarput nassuiaassimmi: "Sulisussarsiortarneq sulisooreersullu tigummiinnartarnissaat pillugu nassuiaat" aasakkut 2017-meersumi.

Nalunaarummi ilaatigut atuarneqarsinnaavoq nunanut allanut ilinniariarsimasut 56 procentii naammassingaangamik ukiut qulit kingorna Kalaallit Nunaanni najugaqalersartut. Tassa allatut oqaatigalugu nunanut allanut ilinniariarsimasut affaat angerlaqqinneq ajorput.

Annerpaat pissutaasut ilaat tassaavoq ilinniartut nunani allani ilinniarnermi inuiaqalersarnerat. Taamaasingaangallu ilaqutariit meeqperivinni inissamik pisariaqartitsilersarput imaluunniit allatigut ulluunerani angerlarsimaffimmi paarsisoqarnissaminut pisariaqartitsilersarput, ilinniartuq nunaminut uteqqilluni inuiaqatigiinnut pilersueqataalissappat. Sualummik tamanna Nuummi angisuumik ajornartorsiutaavoq utaqqisut amerlasaqimmata.

Nunani allani ilinniartut nunaminut uteqqillutik inuiaqatigiinnut pilersueqataalissappata aaqqiissutaasinnaavoq kommunimi meeqperivinnut imaluunniit ulluunerani angerlarsimaffimmi paaqqinnittarfinnut qitornaasa sallinngortinneqartalernissaat.

Tamatuma kingunerisariaqassavaa nunaqavissut inissamik inangerneqartalernissaat. Nalunngilara tamanna naapertuutinngitsoq, isumaqarpungali ajornerusoq ilinniartut nunani allaniiginnarlutik piginnaasatik atortassapatigut. Tassunga atatillugu puigussanngilarput tamatta akileeqataanikuugatta ilinniartut ilinniagaqalernissaannut aamma taamaattumik uggornassaqaq aningaasaliissutigisimasagut

---

<sup>1</sup> "Uani imatut paasillugu "Kalaallit Nunaata ungataani"



erniortissinnaangikkutsigit.

Taamatut oqaaseqarlunga qilanaarpunga Naalakkersuisut akissuteqarnissaannut partiillu allat saqqummiussassaannut.

**Pisortanut aningaasaqarnikkut allaffissornikkullu kingunerisassai**

Siunnersuut piviusunngortinneqassappat inatsisissamut siunnersuusiortoqartariaqassaaq, Meeqqanut suli atualingitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaanni § 9 allanngortinneqassappat<sup>2</sup>. Allaffissornikkut nukiit atorneqartussat, nutserinissaq, tusarniaanissaq inatsisillu oqaasertaanik misissuinerit ilanngutereerlugit ilinniagartuup ukiup affaani sulineranit akisunerussasut naatsorsuutigineqanngilaq.

Inatsit allanngortinneqarpat pisortani oqartussaaffiit nunani allani ilinniartut akornanni ilinniarluarsimasunik sulisussarsiortarnissaat ajornaannerulissaaq.

**Inuussutissarsiornermut aningaasaqarnikkut allaffissornikkullu kingunerisassai**

Namminersortut nunani allani ilinniartut akornanni ilinniarluarsimasunik sulisussarsiortarnissaat ajornaannerulissaaq.

**Innuttaasunut aningaasaqarnikkut allaffissornikkullu kingunerisassai**

Siunnersuutip nunaqavissunut kingunerissavaa, illoqarfiit ilaanni - sualummik Nuummi - meeqqerivimmi angerlarsimaffimmiluunniit ulluunerani paaqqinnittarfimmi inissamik utaqqisarnerat sivitsussaaq. Nunani allani ilinniartut qitornaat meeqqerivinni ulluuneraniluunniit angerlarsimaffinni paaqqinnittarfinni sukkannerusumik inissarsissunneqartalissapput Kalaallit Nunaanni sulerusullutik akuersissappata.

---

<sup>2</sup> Inatsisartut Inatsisaat normu 16 3. december 2012-meersaq